

Ina sessiun cun gronda tensiun

La revisiun da l'AVS en il center

DA LUCAS DEPLAZES / ANR

■ **Glindesdi proxim, ils 27 da favrer cumenza a Berna la sessiun da primavaira. En il center da la debatta parlamentara stat la refurma da la prevenziun per la vegliadetgna 2020. Quella cumpiglia la renta da l'AVS e las prestaziuns da las cassas da pensiun. La refurma 2020 duai segirar in viver senza quitads finansials en la vegliadetgna. Finamira è da mantegnair il nivel actual da las rentas.** Il cussegl dals chantuns propona d'augmentar la renta da l'AVS per 70 francs il mais e sin quella moda cumpensar per part la perdita tar la cassa da pensiun. Tar la cassa da pensiun duai la tariffa da conversiun vegnir sbassada da 6,8% sin 6%. Quella soluziun è stada pussaivla grazia ad

ina coalliziun tranter la pcd e la pss che disponan ensemen d'ina maiortad en la chombra pitschna. Il cussegl naziunal – sut l'egida da la pps e da la pld – refusa in augment da la futura renta en questa furma. Las frontas paran dad esser claras e diras. Il parlament ha previs pliras debattas per tschertgar ina soluziun. La decisiun vegn bain dada tar las votaziuns finalas il venderdi, ils 17 da mars proxim.

Las partidas han marcà lur posiziuns La Partida populara (pps) e la Partida liberaldemocratica Ils Liberals (pld), mantegnan lur posiziuns. La pps crititgescha che il model dal cussegl dals stadis (plus 70 francs il mais) mainia ad ina communitad dividida. Tgi che va da nov en renta po profiter da l'augment, ils «veders»

possian guardar suenter. Ina part da la pld fiss pronta da laschar ir la fatschenta da la glatscha giu. Quai che ha provocà ina reacziun da sia presidenta *Petra Gössi*. En ina posiziun presidiala ha ella admonì ils (gronds) patruns da supigliar dapli responsabladad sociala e constatà che divers exponents da l'economia hajan pers il sensori politic necessari.

La Partida cristiandemocratica (pcd) e la sanestra (La Partida socialdemocratica (pss), ils verds) sustegnan las propostas dal cussegl dals chantuns. Sco quai che la Partida burgais-democratica (pbd) ha communitgà resta ella sin la lingia dal cussegl dals chantuns. Quella schliaziun saja equilibrada ed haja ina schanza tar la votaziun dal pievel. Per la pbd saja quai ina dumonda centrala che las propostas chattian ina maiortad tar il pievel. Bain

è scadina partida persvasa da la necessitad d'ina refurma, dentant sche mintgina defenda sia posiziun vegn la refurma a far naufragi. La pli chara varianta fiss, tenor la pbd, sche la refurma giess da l'aua giu.

En tut cas impedir in naufragi

En ina brev averta a Petra Gössi, a la presidenta da la pld, fa il sindicat «Travail Suisse» attent a la muntada enorma da la refurma 2020 per ils lavurers. Il success da la refurma saja decisiv per la confidenza da las burgaisas e dals burgais en la politica da noss pajais. Sin il post da prova stettian las ovras socialas acquistadas las pli impurtantas da la Svizra – numnadain l'AVS e las cassas da pensiun. Mo ina refurma da bun egl possia recaltgar la confidenza da la populaziun ed impedir

ina ruina. In naufragi muntass per ils proxims onns ina situaziun politica fitg precara, scriva Travail.Suisse.

La giuventetgna fa quitads per lur AVS

Sco quai ch'ina recenta retschertga da «Vimentis» demussa fa gronds quitads ina gronda part da la populaziun (46%) davart l'avegnir da las ovras socialas. Dus terz da la giuventetgna dubitian ch'ella possia avair ina pensiun adequata en lur vegliadetgna. Tenor l'enquista fiss la populaziun pronta da contribuir dapli per segirar las rentas. In augment da la vegliadetgna da renta sin 67 onns u schizunt ina reducziun da la pensiun vegn dentant refusà dad 88 pertschient dals participants a la retschertga.